

REGIONAL NEWS UNIT
ALL INDIA RADIO, AGARTALA
Date: 25-03-2026
Time: 07:35-07:40 AM Hrs
BENGALI MORNING BULLETIN

ADC Election :

আসন্ন এডিসি নির্বাচনে আজই মনোনয়নপত্র দাখিলের শেষ দিন। আগামীকাল ২৬ শে মার্চ মনোনয়নপত্রগুলো পরীক্ষা করে দেখা হবে। মনোনয়নপত্র প্রত্যাহারের শেষ দিন আগামী ২৮ শে মার্চ। ভোট গ্রহণ করা হবে আগামী ১২ ই এপ্রিল। সকাল ৭ থেকে বিকেল ৪ টা পর্যন্ত চলবে ভোট গ্রহণ। আগামী ১৭ ই এপ্রিল ভোট গননা করা হবে। এডিসি-র ২৮ টি আসনে মোট ভোটার রয়েছে ৯ লাখ ৬২ হাজারের বেশি।

Bye-Election :

ধর্মনগর বিধানসভা কেন্দ্রের উপ নির্বাচনের গতকাল স্কুটিনির পর ৬ জন প্রার্থীর মনোনয়নপত্রই বৈধ বলে বিবেচিত হয়েছে। প্রার্থীরা হলেন - বিজেপির জহর চক্রবর্তী, সি.পি.আই.এমের অমিতাভ দত্ত, জাতীয় কংগ্রেসের চয়ন ভট্টাচার্য, আমরা বাঙালি দলের বিভাস রঞ্জন দাস, এস.ইউ.সি.আই'এর সঞ্জয় চৌধুরী এবং নির্দল প্রার্থী ব্রজলাল নাথ। রিটার্নিং অফিসার দেবযানী চৌধুরী গতকাল এখবর জানিয়েছেন। তিনি জানান, নির্বাচন কমিশনের সাধারণ পর্যবেক্ষক হরিশ

কুমার কে, পুলিশ পর্যবেক্ষক সতিশ বিনো, ব্যয় পর্যবেক্ষক ড. বীর ধ্যানেশ্বর উপ-নির্বাচনের কাজকর্ম তদারকি করার জন্যে ইতিমধ্যে ধর্মনগরে পৌঁছে গেছেন।

ECI Meeting :

নির্বাচন কমিশন গতকাল ধর্মনগর বিধানসভা কেন্দ্রের উপ-নির্বাচনের প্রস্তুতি নিয়ে পর্যালোচনা বৈঠক করেন। ভার্চুয়ালভাবে অনুষ্ঠিত এই বৈঠকে উপস্থিত ছিলেন মুখ্য নির্বাচন কমিশনার জ্ঞানেশ কুমার, নির্বাচন কমিশনার ডঃ এস এস সান্দু এবং ডঃ বিবেক জোশী। আগরতলা থেকে ভার্চুয়ালভাবে বৈঠকে উপস্থিত ছিলেন রাজ্যের মুখ্যসচিব, মুখ্য নির্বাচনী আধিকারিক, পুলিশের মহানির্দেশক। এই বৈঠকে মুখ্য নির্বাচন কমিশনার হিংসামুক্ত, ভীতিপ্রদর্শনমুক্ত ও প্রলোভনমুক্ত নির্বাচন নিশ্চিত করার উপর গুরুত্ব আরোপ করেন। বৈঠকে ধর্মনগর বিধানসভা কেন্দ্রের আইন-শৃঙ্খলা পরিস্থিতিও পর্যালোচনা করা হয়। উপ-নির্বাচনকে ঘিরে শান্তি ও শৃঙ্খলা বজায় রাখতে সীমান্তবর্তী অঞ্চল সিল করার জন্য নির্বাচন কমিশনের পক্ষ থেকে বলা হয়েছে।

Tipra Motha-Candidate :

আসন্ন এডিসি নির্বাচনে প্রতিদ্বন্দ্বিতার জন্য তিপ্রা মথার সভাপতি বিজয় কুমার রাজ্যল ২৮টি আসনে তিপ্রা মথার প্রার্থীদের নাম ঘোষণা করেছেন। প্রার্থীরা হলেন-দামছড়া-জম্পুই আসনে ভব রঞ্জন রিয়াং, মাছমারা আসনে স্বপন কুমার

চাকমা, দশদা কাঞ্চনপুর আসনে উমাশংকর রিয়াং, করমছড়ায় রতিশ ত্রিপুরা, ছামনুতে হংস কুমার ত্রিপুরা, মনু ছৈলেংটায় হলিউড চাকমা, ডেমছড়া-কচুছড়ায় ধীরেন্দ্র দেববর্মা, গন্ডাছড়া-গঙ্গানগরে খত্রজয় রিয়াং, আশারামবাড়ী-হালাহালিতে প্রশমিত দেববর্মা, কুলাই-চাম্পাহাওরে রাজেশ্বর দেববর্মাকে প্রার্থী করা হয়েছে।

তাছাড়া, তেলিয়ামুড়া-মহারানীপুর আসনে উৎপল দেববর্মা, রামচন্দ্রঘাটে জেমস দেববর্মা, সিমনা-তমাকারিতে রবেন্দ্র দেববর্মা, বোধজংনগর-ওয়াকীনগরে রুনিয়েল দেববর্মা, জিরানিয়ায় জগদীশ দেববর্মা, মান্দাই-পুলিনপুরে জিতেন দেববর্মা, পেকুয়ারজলা-জন্মেজয়নগরে গীতা দেববর্মা, টাকারজলা-জম্পুইজলায় সুরজ দেববর্মা এবং আমতলী-গোলাঘাটিতে বুদ্ধ কুমার দেববর্মাকে প্রার্থী হিসেবে মনোনীত করা হয়েছে।

কিল্লা-বাগমা আসনে পূর্ণ চন্দ্র জমাতিয়া, মহারানী-চেলাগাংয়ে সিকে জমাতিয়া, কাঠালিয়া-মির্জা-রাজাপুরে ডেভিড মুড়াসিং, অম্পিনগরে কমল কলই, রাইমাভ্যালিতে ধনঞ্জয় ত্রিপুরা, নতুনবাজার-মালবাসায় সুরজয় উঁচুই, বীরচন্দ্র-কলসিতে কেনারাম রিয়াং, পূর্ব মুহুরীপুর-ভুরাতলিতে দেবজিৎ ত্রিপুরা এবং শিলাছড়ি-মনুবনকুল আসনে মনীন্দ্র মগকে তিপ্রা মথার প্রার্থী হিসাবে মনোনীত করা হয়েছে। গত রাতে এক বিবৃতিতে এখবর জানানো হয়।

Vasanti Puja :

আজ মহাসপ্তমী তিথির মধ্যে দিয়ে শুরু হচ্ছে চারদিনব্যাপি বাসন্তী পূজা। দেবী দুর্গার অন্য প্রতিরূপ দেবী বাসন্তীর পূজা হয় চৈত্র শুক্লা তিথিতে বসন্তকালে।

পৌরাণিক কাহিনী অনুসারে, রাজা সুরথ নিজের রাজ্য ফিরে পেতে ঋষি মেধসের পরামর্শে প্রথম বসন্তকালে দেবী দুর্গার আরাধনা করেছিলেন।

রাজ্যেও ধুমধামের সঙ্গে বিভিন্ন বাড়ি, ক্লাব ও সংস্থার উদ্যোগে এই পূজার আয়োজন করা হয়েছে। আগরতলার দুর্গাবাড়িতে সরকারী আয়োজনে চিরচরিত প্রথা অনুযায়ী এবছরও বাসন্তী পূজার আয়োজন করা হয়েছে।

BramhaKunda Mela :

তিনদিনব্যাপী ব্রহ্মকুন্ড মেলা ও প্রদর্শনী আজ থেকে মোহনপুর মহকুমার ব্রহ্মকুন্ডে শুরু হবে। আজ বিকাল ৪টায় মেলা ও প্রদর্শনীর উদ্বোধন করবেন পশ্চিম ত্রিপুরা জিলা পরিষদের ভারপ্রাপ্ত সভাপতি বিশ্বজিৎ শীল।

Police-RRU Mou :

পুলিশের আধুনিকীকরণ ও দক্ষতা বৃদ্ধির লক্ষ্যে গান্ধীনগরের রাষ্ট্রীয় রক্ষা বিশ্ববিদ্যালয় বা আর.আর.ইউ. সাথে চুক্তি স্বাক্ষরিত হয় রাজ্য পুলিশের। গতকাল সন্ধ্যায় পুলিশ সদর দপ্তর থেকে ভার্চুয়ালি এই চুক্তিপত্রে স্বাক্ষর করেছেন রাজ্য পুলিশ মহানির্দেশক অনুরাগ এবং আরআরইউ-র প্রো ভাইস চ্যান্সেলর কলপেশ এইচ রান্দ্রা। পুলিশ সদর দপ্তর জানিয়েছে, চুক্তি অনুযায়ী, আরআরইউ ত্রিপুরা পুলিশের কর্মীদের জন্য উন্নত প্রশিক্ষণ কর্মসূচি, গবেষণা সহায়তা এবং বিভিন্ন জ্ঞানভিত্তিক উদ্যোগে সহযোগিতা করবে। এর ফলে

রাজ্যের পুলিশ বাহিনীর পেশাগত দক্ষতা ও আধুনিক অপরাধ দমনে সক্ষমতা আরও বৃদ্ধি পাবে।

Maan Ki Baat :

প্রধানমন্ত্রী নরেন্দ্র মোদী আগামী ২৯শে মার্চ, রবিবার সকাল ১১টায় আকাশবাণীর 'মন-কি-বাত' অনুষ্ঠানে দেশ-বিদেশের জনগনের সঙ্গে মতবিনিময় করবেন। এটি হবে 'মন-কি-বাত'-এর ১৩২তম পর্ব। প্রধানমন্ত্রী জনগনকে তাদের সুচিন্তিত চিন্তাভাবনা 'মন-কি-বাত'-এ জানানোর আহ্বান জানিয়েছেন। my gov open forum-এ এবং Narendra Modi App-এ জনগণ তাদের মতামত পাঠাতে পারবেন। এছাড়াও TOLL FREE NO. 1800-11-7800 নম্বরে কল করে হিন্দি বা ইংরেজিতে মতামত রেকর্ড করানো যাবে। ফোনলাইন এমাসের ২৭ তারিখ পর্যন্ত খোলা থাকবে।

Weather :

আজ আকাশ সাধারণত মেঘলা থাকবে। বজ্র-বিদ্যুৎ সহ হালকা থেকে মাঝারি বৃষ্টিপাতের সম্ভাবনা রয়েছে। আগরতলায় আজ ভোরে সর্বনিম্ন তাপমাত্রা ছিল ১১.৫ ডিগ্রি সেলসিয়াস। দিনের সর্বোচ্চ তাপমাত্রা থাকবে ৩২ ডিগ্রির কাছাকাছি।
